



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma : Tir Yimym

tiryimym@aolima

tir yimym

TAPAK 7

Erling Haaland-i Men's PFA Player Of The Year Award agizükogo

Taoba Pakistan PM Imran Khan tepuokdaksa alitsü



VOL. XX NO. 319 (ADOK 319) DIMAPUR YANGTEPNÜ (THURSDAY) LUROI (AUGUST) 31, 2023 ₹ 5.00

Governor La. Ganesan-i Dimapur semdang CM Rio-i nisung 587 nem appointment letters agütsü

Dimapur, August 30, 2023 (DPRO): August 30, 2023 nü Nagaland Governor La. Ganesan-i Dimapur District semdangda HODs aser Civil Society Organisations den senden ka amen.

Dimapur ya Nagaland asoshi kishizüing lir aser Nagaland-i aruba khu aser nisung ajak Dimapur adener kechiyong Dimapur nung rail aser air connectivity moaja lir ta Governor Ganesan-i ashi.

North East India nung Guwahati sülen Dimapur railway station ya railway station tanabuba lir anungji sorkari world class railway station ka kümdaktsüsü sentong lir ta paisa ashi.

"Ali tasazük nungbo Dimapur ya Nagaland nung district tilatiba asütsü saka Dimapur District-i state rongsenketzüng nung shilem tuluka agir" ta Governor-isa metetdaksü.

"Lisem aser lungsang mashie agitetba ajanga ayongkütem anenzüka aoer. Asenoki ali anenzüka aoba khuret ya tang mereprangi toktsüra tarutsü nung timtem tulu ajurutsü. Anungji nübertemi shisadangtsüla aser water resource management dang nungi shisatsü agia inyaksangshitsü ayongzüker" ta Ganesan-i ashi.

"Dimapur ya modern city ka lir anungji proper drainage aser sewerage system alitsü nüngdaker. Dimapur yimtsü merüka ayutsü

atema underground drainage aser sewerage yanglutsüla. Iba atema sorkar bangdak department tem aser sensotem külemi yariteptsüla" ta paisa ashi.

Nagaland nung shisaliok tiyongtsüji Dimapur lir anungji quality education agütsüsüla. School aser college ajaki New Education Policy (NEP) mapa tenzüksü ayongzüker, ta Ganesan-isa ashi.

Lanurtemi drugs achiba khuret atema Governor Ganesan-isa civil societies aser ozüing amertem dang drugs anema inyaktsü ayongzüker.

Nagaland-i drugs bener aruba noktangtsüla aser lanurtemi drugs mangutsüsa kümdaktsüsüla ta pai ashi.

Iba senden nung Dimapur DC, Sachin Jaiswal, IAS-i Governor Ganesan pelashishia agizük aser Dimapur district indang osang tatsüka lemsatepdang traffic timtem ajemtsü atema flyover talila nüngdakba ashi.

Senden nung Naga Council Dimapur, Business Association of Nagaland, Dimapur Naga Students Union, Dimapur Chamber of Commerce, Naga Women Hoho Dimapur ketdangpurtemi tebilebatem lemsatep.

Dimapur district nung HODs of departments-ia pei pei department ajanga inyakba maparen osang lemsatepa liasü.

Kohima Smart City-i best city award angu

Kohima, August 30, 2023 (TYO): India Smart Cities Awards Contest (ISAC) 2022 nung Kohima Smart City (KSC)-i Northeast Zone nungi Zonal Smart City Award nguogo.

"Ministry of Housing and Urban Affairs (MoHUA) ajanga Smart Cities Mission kübok iba tetoktepa ya tan agi pezübenbuba agiogo" ta Kohima Smart City Development Limited, Chief Executive Officer (CEO) Kezhazhelhou Theunuo-i ashi.

September 27 nü Madhya Pradesh kübok Indore nung India Tir Draupadi Murmu-i ISAC 2022 takok angur nem sempet agütsüsü, ta pai ashi.

KSC-i Zonal Smart City Award dak alia MoHUA-i Data Governance nunga KSC nem top performer naroküm agütsüogo.

"Maneni, major ministry interventions - Streets for people, Cycle for change aser Nurturing neighbourhood challenges tematiba yimti 10 nung KSC densemogo aser iba atema senpettem nguogo" ta

Theunuo-isa metetdaksü.

"Iba takok ya Kohima nung alirtemi Northeast region den külemi konang agir. Kohima ya Tobur tajung hill station ka nungi smart, future-ready urban center ka kümogo" ta paisa ashi.

Northeast region nungi Kohima aser Arunachal Pradesh kübok Namchi nem Zonal City Award agütsü, ta Theunuo-isa shisem.

Kohima smart city mapatong 2 nungi 24 renemogo aser 8 ano merenem lir. Iba atema state share 10% (Rs 50 crore) dena Rs 550 crore lezmüksü, ta CEO Theunuo-i ashi.

Taküm December tashi nung mapatong 5- Slum Area Development, Battle Tank redevelopement, Rainwater Harvesting, Local Ground aser Mini Sports Complex (City Centre) renemtsü. February-March 2024 tashi nung mapatong - Hotel Building, Commercial Building aser Muti-level Car Parking (City Centre) renemtsü, ta paisa metetdaksü.



August 30, 2023 nü Capital Cultural Hall Kohima nung Chief Minister Neiphiu Rio-i Group C posts atema appointment letters agütsüba sülen agiba noksa ka angur.

Kohima, August 30, 2023 (TYO): Bodbarnü Chief Minister Neiphiu Rio-i sorkar department 45 nung Group C posts inyaktsü atema nisung 587 nem appointment letters agütsüogo.

Iba sentong ya Capital Cultural Hall Kohima nung ayonga agi aser Nagaland Service Selection Board (NSSB) examinations nung takok angur Group C employees mezüngbuba telok nem appointment letters agütsü.

NSSB ya 2022 küm tetet aser November ita Grade-IV staff mapa 600 tema atema mezüngbuba tatidang agia liasü. Iba tatidang indang results ya taküm July ita sangdong.

District headquarters 13 kübok exam centres 111 nung candidate 50,583-i mapa 630 atema tatidang agüja liasü. September 2022 nung mapa 630 indang advertisement agüja liasü aser tatidang nung nisung 587 shimtet.

"State sorkari mapang talangka tajungtem shimtettsüba aser tashishitsü melii iba maparen inyaktsü meranga aruogo" ta Chief Minister Rio-i ashi.

"Asen kaketshir teloktem aser sendaktepa alirtemi zünger mapa manguba lanurtemi mapa nung shimoktsü atema centralized system ka aginüa liasü" ta pai ashi.

State sorkar kübok mapa 70% tashi Group C posts lir anungji zünger aliba lanurtemi sorkar mapa kanga aginür. Lanurtemi taginüba angateta October 2019 nung State Cabinet-i NSSB inyakyim atema drafting committee ka shim, ta CM Rio-isa ashi.

Iba Committee-i bangdak department tem den asüngdangtepa den tanga State tem nung inyaksangshi reprangdangba sülen Cabinet nem report ka agütsü. Cabinet-i Regulations mulungsoa agizük aser February 14, 2022 nü Chairman shima NSSB mapa tenzüker, ta paisa metetdaksü.

"NSSB-i tatidang takok ngua agiba atema tenüngsang agütsür. Parnoki Clerical & Allied Services Exams (CASE) 2023 mapa 188 atema sangdong agütsür taruba tatidang atema renemdar" ta Rio-isa shisem.

Maneni, Combined Technical Services Exams aser Combined Education Services Exams indang osang mapang shitak nung metetdaksütsü, ta paisa ashi.

"Nenok kibong, tesayurtem nüma atangtsüsa nenoki takok nguogo. Nisung meyirjang den toktepa nenoki meranga ajanga takok nguogo" ta CM Rio-isa mapa angurtem dang ashi.

"Tanü ya Nagaland nung alirtem

asoshi kanga dang tongtipang anogo ka lir. NSSB ketdangsurtemi kanga dang bendanga agüja aser meranga inyakba atema tenüngsang agütsür" ta Tourism and Higher Education Minister Temjen Imna Along-ia ashi.

Paisa mapa angurtem dang office tasen nung inyakdang nübor tenzüksü tangatetba alitsü aser ajemalua pei mapa bendanga agüja inyaktsü ayongzüker.

Grade IV staff atema NSSB examination agiba atema pelar. Iba ajanga yimsüsürtem aser politicians kanga anisüngzüker kechiyong taoba nung nübertemi sorkar mapa aginüa kanga meinpronga aruogo. Saka tang Grade IV mapa atemaa tatidang agiba ajanga yimsüsürtem anisüngzüker, ta Minister Along-isa ashi.

"Sorkar, civil society aser kaketshir teloktem külemi inyakba ajanga common examination system asangsang nung atalokogo. 2020 nung NSSB tetetba ya Chief Minister Rio lenisüba kübok state sorkari kanga dang tongtipang lemtet agiba ka lir" ta Chief Secretary J. Alam-ia ashi.

Iba sentong nung NSSB chairperson Sedevikho Khro aser Commissioner & Secretary P&AR Asenla Keitzar natia o tatsütsü jemba liasü.

Dimapur CSOs-i Governor dang district renlokdaktsüsü mepishir

Dimapur, August 30, 2023 (TYO): Dimapur nung Civil Societies Organisations (CSOs)-i Nagaland Governor La Ganesan dang Dimapur District nung terenlok mapa kar inyaktsü shia shidi ka agütsüogo.

"Mapang talangka Dimapur senzüka yutsür aser sorkar terenlok mapa kecha meinyakba den action plans tasen kecha mali" ta Dimapur nung CSOs-i shidi nung shia lir.

Parnoki Governor nem shidi agütsüba nung state sorkar dang Amar Mill point nungi Burma camp, Dhansari bridge, Dimapur tashi kilometer ana 2-lane road yanglutsü shiogo.

Dimapur CSOs-isa Daily Market Bamunpukhuri-I nungi New Naga Cemetery, Zani Village tashi gari lenmang metaling aser black topping asütsü metetdaksüogo.

"Dimapur nung 2005 nungi Dimapur Multi-Disciplinary Sports Complex yanglutsü tenzüker saka tanü tashi iba mapa metembang lir anungji lanur saisapongertem atema tekaratiba nung iba complex renemtsü

mepishir" ta parnokisa Governor Ganesan dang ashi.

Dimapur Civil Hospital teyangluzüker dang lir saka tang mapa inyakba kecha mangur anungji iba mapa mapang lateta yur tembangtsü mepishir ta parnokisa ashi.

Dimapur nung traffic khuret ajemtsü atema Plaza Point nungi tang aliba Railway Over-bridge tashi Fly-Over Bridge tasen ka yanglutsü nüngdaker ta Dimapur CSOs-isa metetdaksüogo.

Dimapur district nung NLTP Act- 1989 mapa meinyakteter anungji Dimapur district nung iba Act agientsü mepishir. Onoki mapang shia public aser law department dang yi ayokba dokantem shibangtsü atema nenshia arur saka NLTP ACT-1989 ya asayamenu ka ama dang kümogo, kechiyong Dimapur nung yi ayokdak 1000 jungnüa lir, ta parnokisa Governor Ganesan dang ashi.

Iba Act ajanga drugs achir aika kümogo aser iba ya talisa school aser college kaketshirtem lir. Anungji taruba Nagaland Legislative Assembly session nung

iba onük benoka jembitsü mepishir, ta Dimapur CSOs-isa ashi.

One District One Product (ODOP) ajungkettsü nükjidong nung Union Budget 2023-2024 nung linük ajungalen Unity malls lapoktsüba nung Dimapur asoshi Unity Mall ka lezmüksü. Ajisüka iba Unity Mall ya tanga district ka nungang yanglutsüba sentong atongba ya Dimapur nung alirtemi magizüker anungji Unity Mall lapoktsüba tesem shimtetba ama Dimapur nung iba Mall yanglutsü mepishir, ta parnokisa ashi.

Governor La Ganesan dangi züluba shidi nung Naga Council Dimapur (NCD), Naga Women Hoho Dimapur (NWH), Dimapur Naga Students' Union (DNSU), Dimapur Urban Council Chairmen Federation (DUCCF), Dimapur Goan Bura's- Sadar (DGBS), Dimapur Chamber of Commerce & Industry (DCCI), Dimapur District GB Federation (DDGBF), Business Association of Nagas (BAN) aser Dimapur Eastern Naga Students Union (DENSU) tirtemi sign süa lir.

AOR ORDAINED MINISTER-TEM SARASADEM SENTONG :

Dimapur temeküt nung alir Aor Ordained minister toklang tenzüka mapa nungi anener alirtem atema sarasadem sentong ka September 2, 2023 honibar anepdang 9 baji nungi tenzüka Dimapur Ao Baptist Arogo nung agitsü osang lemsateper.

Anungji, Aor Ordain minister toklang tenzüka nungi anener alirtem ajak iba anogo nungji arua shilem agitsü mepishir. Aritepa dang iba sarasadem sentong ayongzüker asünung, Tir Yimym nung osang agütsüba dak alaka shinga dangia osang jurila magütsüteter.

Ajak anema lia, iba sentong nung shilem agitsü sarasadem atadi.

Kibuba nung,
Rev. Dr. L. Kari Longchar

Dimapur nung Raksha Bandhan benjong amung



Nagaland Angh, La Ganesan-i August 30, 2023 nü Durga Mandir Hall, Dimapur nung Raksha Bandhan benjongmung nung jembidang tangokba noksa nung angur.

Dimapur, Luroi/August 30 (TYO): Jan Jati Vikash Samiti Dimapur ajanga Durga Mandir Hall, Dimapur nung August 30, 2023 nü Raksha Bandhan benjong ayongzüka among, kong tesemdanger tongti ka ama Nagaland Angh La Ganesan dena liasü.

Iba benjongmung moaja Angh-i temo milen tsükloksü aser pai ashiba agi, adianu tsüingta raksatsü makokba tesendaktem tushia Raksha Bandhan ya amunger aser kati ka kumzüka ayutsü nangzüker.

"Raksha" tetetzü kumzüka ayuba aser "Bandhan" tetetzü adianutem tsüingta tesendaktep. Iba anogo nung adianutsür temi pei adianu asoshi sarasademsür aser adianu temi taküm piyong tensa tia ajak nung pei adianutsü kumzüka ayutsü nangzüker, ta pai ashi.

Raksha Bandhan tetetzü ya adianu tsüingta temeimtep aliba indang lir. Iba benjong ya adianutemi kanga saboa amshir, kong adianutem tsüingta asayamenüa amunger, ta Nagaland Angh-i ashi.

Iba sentong nung menden Rajeev Ladha liasü, JVSN tesayur temi ken ka aten aser Lalita R Khadaria-i pela agizükba o jembia liasü.

Maneni Thumbui-i JNVS at Glanced sayu, Balijan kaketshir temi Karbi nunger tsüingsang ka ajanga shilem agi, Divya Behan of Brahma Kumari ajanga Raksha Bandhan indang tongmelang agi rateta ashi.

JVSN tesayur temi Dimasa Cultural Dance ka sayu aser Prakash Bothra-i melepzüing o jembia liasü.

Party aintsü asoshi office kanga tongtipang: Minister Kruse



Nationalist Democratic Progressive Party (NDPP) 8th Western Angami Assembly Constituency office tasen ka August 30, 2023 nü TCP gate, Kohima nung semzükdang tangokba noksa ka nung Minister, Women Resources Development and Horticulture, Government of Nagaland, Salhoutuonuo Kruse (tiyong) angur.

Kohima, Luroi/August 30 (TYO): Party aintsü aser mapa shidak inyaksü asoshi political party office kanga tongtipang aser iba yagi party ajanga nüburtem asoshi bendanga agütsür tenzükba sayur, ta Minister, Women Resources Development and Horticulture, Government of Nagaland, Salhoutuonuo Kruse-i tanü ashi.

Bodhbarne TCP gate, Kohima nung Nationalist Democratic Progressive Party (NDPP) 8th Western Angami Assembly Constituency office semzüksüba mapang, office yagi nüburtem teimla aser tejangraba sayur, shirnoki state aintsü aser renloksü asoshi party indang mangdang nung tamang akar, ta Kruse-i ashi.

Office tasenba asoshi 8th Western Angami Assembly Constituency indang NDPP ketdangpur nem tenüingsang agütsüba mapang lai parnok dang

nüburtemi timtem balala ajurua aliba koktettsü asoshi tali bendanga agütsür inyaksü ayongzük aser nüburtemi nüngdakba den apel lenmang balala bushiba nung tashi indoktsü ajungshia liasü.

"Nüburtemi asen dak tamang akaba ajanga political party ka ama asenoki asen tashi teti biletettsüla aser tashi anga bendanga agütsür inyaksü akhanger," ta Kruse-i ashi.

Lai party züngsemtem dang iba office ya jembishinüba, shisa lemsatepba aser tajung bilemba lemsatepba nung amshitsü ayongzükba liasü.

"Lemsar aliba lungjemtsü, metokmeperi aliba yaritsü aser asen nübur aginüba ataloktsütsü meranga party nükla nung ajemdaker bendanga agütsür inyakti," ta lai ashi.

NDPP Kohima Region, tir Prasielie Pienyü-ia Western Angami AC indang NDPP den

tepela lemsatepba den külemi iba office tasenba ya party tashi itshitsü asoshi amshiti, ta ashi.

Pai party lenirtem aser züngsemtem dang tali telungjemba aser tangatettep nung ULB elections, delimitation aser Lok Sabha election 2024 asoshi inyaksü ayongzükba liasü.

Political party timbai nangzükba ama meinyaker, saka NDPP yagibo nangzükba ama inyaker, ta pai ashi.

State nung mapang talangba telemtetba agiba sapang nung tetsürtem mali aru, anungji tetsür tashi aser temeten kanga tongtipang kumogo, ta Pienyü-i ashi.

Tetsür legislator ana shimer lenmang balala sayuba asoshi tenüingsang agütsüdang ano party züngsem temi yaritsü aser amalitep akatsü, ta ashi.

Iba office tasenba ya meshitetja Avilie Punyü, Pastor, Bethel Baptist Church ajanga sarasadema liasü.

Nagaland Police-i Cyber Volunteers atema tenüing zülüoker

Dimapur, Luroi/August 30 (TYO): Cybercrime tebilemstü koktettsü aser cyber space temürek aser tajung alitsü nükjidong nung Ministry of Home Affairs (MHA) indang Indian Cyber Crime Coordination Centre (I4C) ajanga Cyber Crime Volunteer Framework ka yanglua lir aser iba nung shilem agiba nüburtemi cyber-crime tebilemstü azüoktsü.

Cyber Crime Volunteer Framework nükjidong ya nüburtem tenzüktsü tejangraba aliba senso tem ka kuma lungjemdaksütsü lir.

Cyber Crime Volunteer Framework ya "National Cybercrime Reporting Portal (NCRP)" (www.cybercrime.gov.in) nungi amshitetsü.

India senso mashi kati

NCRP nung "Cyber Volunteer" ka ama register sütettsü aser iba atema "Register as a Volunteer" tab nung anemtsü aser shia aliba ama inyaksüla.

Volunteers tem ya State indang Law Enforcement Agencies aser nüburtem tsüingta apu ka ama inyaksü aser nüburtem nem awareness agütsüba nung yaritsü.

Cybercriminals temi cybercrime tali inyakba aser technologies tasen amshiba mechi nüburtem dang cybercrimes indang nükjidong angatetdaksütsü kanga tongtipang kumogo.

Volunteers tem ya nüburtem nem awareness agütsür ka ama inyaksü, social media sapang balala mesüra danga osangtsüsang agitepba yimya nungi nüburtem den iba osang lemsatepstsü.

Dimapur nung Fortified Rice indang awareness sentong liogo

Dimapur, Luroi/August 30 (TYO): Public Distribution System (PDS) kübok Fortified Rice indang tajungba nung angatetdaksütsü aser

ajungkettsü nükjidong nung awareness sentong ka FPS Dealers, VC Chairmen, Ward Chairmen, GBs, CSOs aser ano lokti tentet balala asoshi awareness sentong ka August 29, 2023 nü IMC Hall nung ayongzükba liasü.

Iba sentong ya Dimapur, Niuland aser Chumukedima district tem nung aliba Department of Food & Civil Supplies ajanga PATH (Department's Technical Partner on Fortified Rice) den lungjemer ayongzükba liasü.

Shisalen sayur Shanpanthung Ezung, State Technical Officer, PATH, shibai anibelem mesasai Nagaland nung iba indang awareness agüja jajar, pai Fortified Rice ya plastic jang masü saka teti amshiba jang

nung Iron, Folic Acid aser Vitamin B12 densema micro nutrient inokba dang lir ta jangjashitsü.

State aser linük nung anemia samadaksütsü mechi ibai Government of India ajanga tenzükba sentong ka lir, ta pai ashi.

Chiyongsü fortification nung tabu trok lir aser itemji metsü (salt), mamatzü, atta, oil (totzü), jang, süngjanglijang tzü (fruit juice) alitsü.

Linük nung süngjanglijang tzü fortification atema linük nung tawa tenzükogo, ta pai ashi.

Iba sentong nung menden ya S.Kavito Aomi, Assistant Director, Food & Civil Supplies, Dimapur liasü aser paisa tarur pela agizükba o jembi. Iba sentong nung I Anungba Sanglir, Joint Director, Food & Civil Supplies, aser Dr.Kapenlo Thong, Deputy Director, Food & Civil Supplies nunger temia o tatsütsü jembia liasü.



Linük nung quiz competition tulutiba, INTACH National Heritage Quiz 2023 sentong August 30, 2023 nü Don Bosco Institute for Development Learning -DBI dl, Riverbelt Colony, Dimapur nung agia liasü. Iba tetoktepba nung takok angur, Imkongsunep Longchar & Sentimoa Longkumer, Delhi Public School nungi aser INTACH züngsemtem noksa nung angur.



August 30, 2023 nü Mysuru nung 'Gruha Lakshmi' scheme tenzüksüba sentong nung Karnataka Chief Minister Siddaramaiah, Deputy Chief Minister DK Shivakumar, Congress Tir Mallikarjun Kharge, party lenir Rahul Gandhi aser tangartem tangokba noksa nung angur. Iba scheme kübok kibong nung tetsüti crore 1.2 nem ita shia sen meyirjang anana (2,000) agütsüsü.

India nunger shilem 80 jungnüai PM Modi sapur: Pew Survey

New Delhi, Luroi/August 30 (Agencies): India nunger shilem 80 jungnüai Ato kilonser, Narendra Modi sapur aser pai alima sabang nung India tenüing ajungketsür ta bilemer, ta Pew Research Center-i agiba survey ka ajanga bushitet.

Iba survey ya taküm February ita nungi May tashi agia liasü aser survey nung India den linük 23 nung alir 30,800-i shilem agia liasü.

Indian nunger shilem 79 dak temai Ato kilonser Modi sapur aser iba nungjagi shilem 55-ibo

pa kanga sapur, ta survey ajanga bushitet.

Survey nung shilem agi shilem 20-ibo Modi mesapur. Taruba ita New Delhi nung G20 lenirtem senden amentsü lia iba survey osang sangdongogo.

India nunger shilem 68-i tesüiba küm ishika tsüngda alima sabang nung India tenüing ajungketsüogo ta bilemer saka shilem 19-ibo alima sabang nung India nunger jenjang ajemzükogo ta bilemer, ta survey ajanga bushitet.

Iba survey nung Russia,

China, Saudi Arabia aser Turkey linüktembo medensem.

Europe nung aliba linüktem nungbo Modi tenüing ajemogo; talisa küm 17 tejaklen France nung India nunger shilem 70-i Modi sapua aliba nungi 2023 küm nungbo shilem 39 dang kümogo.

Linüktem tsüngda tesendaktep dak sendakba nung Israel nunger shilem 71-i India sapur; Isreal nunger shilem 42-i Modi dak melung lemteter aser shilem 41-i melung melemteter.

India-i China indang map tasen ka ashishir

New Delhi, August 30 (Agencies): China-i parnok indang map nung Arunachal Pradesh aser Aksai Chin na züngokba atema Foreign Minister, S Jaishankar-i China aitsüogo.

China-i parnok map nung India litsütem züngokyonga parnoki item litsüji magitetsü, ta Jaishankar-i metetdaksü.

External affairs ministry-ia China ketdangsertem den tongtepratepa China sorkari Hombarnü sayaba 2023 "standard map" ji aitsüogo.

External Affairs Ministry nung otongdar, Arindam Bagchi-i, "Onoki ibaji magizüker, kechiyong iba nungji tajemdakdak kecha mali. China-

i item ama inyakbaji ajanga arrtsü dak sendakba bangzüng tamajungba dang kümdaktsüsü," ta metetdaksü.

Jaishankar-i, "China-i parnok map nung India nunger litsü züngokbaji parnok atema yimya sübaba tejen yimya ka kümogo. Parnok indang map nung India nunger shilem züngokba jagi kecha temelenshi malitsü. Tangar indang litsü parnok meyong, ta sangdongbaji ajanga nenok meyong makümtsü," ta metetdaksü.

Taruba ita New Delhi nung G20 senden nung adentsü atema China Tir, Xi Jinping-i India semdangtsü lia China-i map tasenba sayar.

Ano külen tanga osang ka nung, China indang map tasenba nung ajemdaker Bodhbarnü Congress lenir, Rahul Gandhi-i, Ato kilonser Narendra Modi-iba dak sendakba nung sangdong ka agütsüsüla, ta takhangba agütsü.

Rahul Gandhi-i, "Ato kilonseri, Ladakh nung ali inch ka dang mesama, ta jembibaji yazü ta ni tesüiba küm aika jembia arur. Ladakh nung alirtem ajaki China-i litsü adena aitba meteta dang lir. Iba map ya süoki ia agitsüsa tebilemtsü onük ka lir. Parnoki asen li agiadokogo. Iba dak sendakba nung Ato kilonseri langkabo ashitsüla," ta metetdaksü.

Centre-i Lok Sabha election kera ayongzüksüa akok: Nitish Kumar

Patna, August 30 (Agencies): Bihar chief minister Nitish Kumar-i, Union sorkar nung alirtemi Lok Sabha selection kera ayongzüksüa akok, ta ashi.

West Bengal Chief Minister, Mamata Banerjee-ia, BJP-i taküm December ita nung Lok Sabha election ayongzüksüa akok, ta jembioogo.

Hombarnü TMC tongti lenir, Mamata Banerjee-i, sorkari taküm December mesüra sangküm January ita nung Lok Sabha elections ayongzüksüa akok, ta jembia liasü.

Nalanda District kübok Bargaon yimdam Nalanda Open University indang building tasen semzüksüba sülen osangbenertem den jembidang Nitish Kumar-i, "Lok Sabha elections mapang mashie ka nung agitsüa akok. Union sorkar nung alirtemi election agitsü mapang atsüzüksüa akok aser kera election agitsü akok," ta metetdaksü.

Tasüngdangba ka langzüdang JD(U) lenir Nitish-i, "Union sorkari Lok Sabha election kera ayongzüksüa akok, ta ni tesüiba ita 7-8 jembia arur. Anungji (opposition) party ajaki tekeraba nung longjemtsüla," ta ashi.

Mumbai nung August 31 aser September 1 anogotem

nung INDIA teloktep senden dak sendakba nung tasüngdangba ka langzüdang pai, "Kü teinyaktsü mapaji taruba Lok Sabha election matongdang akokba tashi party aika longjemdaksütsü atema lir. Ni menden kar aginüa mali. Ni nükjidong yua mali. Yashi-ani ibaji jembioogo," ta metetdaksü.

Mumbai nung ayongzükba senden nungji party tasen kari INDIA teloktep nung adentsü asü?, ta asüngdangba langzüdang pai, "Tangbo item party atema jembitsüji tim masü. Oda repranga dang liang. Lenir tasen kar senden nungji adendang nenoki metettsü. Senden mamandang parnok tenüing metetdaksütsüji tim masü," ta ashi.

Bihar sorkari caste survey agiba dak sendakba ken o nung Centre sorkari Supreme Court nung affidavit yanglushiba atema tasüngdangba ka langzüdang pai, "Tang tagidak caste survey ya nübür ajak atema lir. Kari iba anema nokdakba nungji tetezü kecha mali," ta ashi.

Chief Minister-isa, "Nisung kari metetsümonga caste survey anema nokdaker, kechiyong ozü sorkari nübürtem ajungtsü atema mapa tajung inyaker," ta ashi.



August 30, 2023 nü Srinagar nung taoba mapang J&K chief minister aser PDP Tir, Mehbooba Mufti-i party nung lenir tasenpurtem agizükdang tangokba noksa nung angur.

AAP lenir kati INDIA nungi PM candidate ji Kejriwal südaktsüner

New Delhi, August 30 (Agencies): Mumbai nung Opposition INDIA teloktep senden amentsü anogo ka dang lia Bodhbarnü AAP lenir, Priyanka Kakkar-i, lai INDIA teloktep nungi Ato kilonser candidate ji AAP tongti lenir aser Delhi Chief Minister Arvind Kejriwal südaktsüner, ta ashi.

Bodhbarnü osangbener den jembidang lai, "Nenoki kü dang asüngdangra nibo Arvind Kejriwal Ato kilonser candidate südaktsüner," ta ashi.

Laisa, AAP tongti, Kejriwal-i nübürtem tebilemtsü onüktem atema jembia inyaker aser linük nung tematiba office menden atema Ato kilonser Narendra Modi den tokteptsüsa temsüa alirji pa (Kejriwal) lir, ta ashi.

"Ozü sorkari (AAP) tzü angati agütsür, shisaliok angati, electricity angati, bus nung tetsürtem angati senzüdaktsür

aser teintet sensotem temeshi aini angati yoker. Ajisüaka onok budget kanga junga lir. Pai (Kejriwal) nübürtem tebilemtsü onüktem atema inyaker," ta lai ashi.

Mumbai nung ayongzükba senden nungji party 26-27 shi adentsü. Iba senden nungji taküm state kar nung assembly elections agitsü aliba aser sangküm Lok Sabha election atema jembitsü. Kasa senden nungjisa INDIA teloktep indang logo sayatsü.

Sangküm General election nung BJP-i aniba National Democratic Alliance (NDA) teloktep den tokteptsü atema opposition party 26 longjemogo. Opposition party tem mezüing June 23 nü Patna nung Bihar Chief Minister Nitish Kumar-i ayongzükba amen aser tanabuba sendenji July 17-18 anogotem nung Bengaluru nung Karnataka Congress-i ayongzükba amen.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA
ADVERTISEMENT**

Kohima Dated the thAugust 2023

No. ED/EST/GR-IV/APPT/DEO-PEREN/11-12 : In compliance to the Hon'bleGauhati High Court, Kohima Bench Judgment order Dated 30-05-2023 WP(C) No. 316/2017,Widunsu -Vs-The State of Nagaland& 5 Ors, applications are hereby invited from indigenous inhabitants of Peren for 1(one) post of Peon/MTS in Pay Matrix Level-1 at GHSSJalukie, under the Establishment of District Education Officer Peren, Department of School Education.

Terms & Conditions:

- Educational Qualification:** Highest class read should be indicated (along with all supporting documents i.e ST/Indigenous/Backward Certificate/Birth Certificate/Class 10 admit card/Aadhar/2 Nos. of recent passport photos).
- Age limit :** The candidates should not be less than 18 years or more than 35 years of age. However in view of the Hon'ble High Court directive, the writ petitioner and private respondent no 5 in W.P(C)No.No. 316/2017 shall be exempted from this age limit for this particular interview
- The application should be addressed to the Principal Director, Directorate of School Education, Kohima-797001
- Last date of receipt of applications shall be 06-10-2023
- Submission of incomplete documents shall be summarily rejected
- Preference shall be given to the indigenous inhabitants of Peren District
- Admit Card shall be issued on 17-10-2023
- Interview shall be conducted on 18-10-2023

**Sd/-
(THAVASEELAN K) IAS
PRINCIPAL DIRECTOR**



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI(AUGUST) 31, 2023

Dimapur nung yi ayoktsü na ?

Dimapur District nung tenteta aliba Naga Council-anir lokti tentetem ajaki Nagaland nung yi meyanglutsü aser mayoktsü atema 1989 küm lateta aliba ozüng ya Dimapur district nungibo agientsüla, kechiyong iba ozüng ya mapa kuma mebenshiteter ta Nagaland angh dang mepishiba ken o nungji tebilemdangtsü aika lir. Iba temepishiba o ya Naga Council Dimapur-i anir Dimapur nung tenteta aliba tongtibang lokti tentetem rongnung Naga Women Hoho Dimapur aser Dimapur Naga Students' Union teloktem dena telok tukoi Nagaland angh dang Dimapur nung nübortem asoshi inyakdaksünua züluba onük tenet rongnung densema lir. Tanga onüktemjia kanga rongdak nungdakba mapatem lir, ajisüaka onük tenet rongnung yi nokdanga aliba agientsü asoshi Naga nungertemi angh dang mepishiba ken o yabo balaka bilemdangtsüba ken o ka lir. Atangji, 1989 küm tashibo Nagaland nung yi talubosa ayokba dang masü saka temulua molua liasü, saka talisa arogo nungertemi akang marem Nagaland government-i yi moluba aser yangluba anendaktsü aser Nagaland ya yi mangudak lima asütsü atema ozüng kuma latet. Tetezü, Nagaland nung yi meyanglutsü aser mayoktsü latetba ozüng ya yimten yimsüsürtemi angatetba aser mulungba agi masü saka arogo nung lenirtemi angatetba aser mulungtetba agi kangshia renemdaktsüba ozüng ka lir. Ashiko, iba jagi Nagaland nung yi meyanglutsü aser mayoktsü ozüng azüngba ya mapa kuma moutetter asütsüa akok. Atangji, Dimapur nung yi yokdaksünertemi yi ya tajung, anungji ajungshia jemdaktsüsüla ta ashiba kulibo mangur. Ajisüaka, parnoki Dimapur nung yi ayoktsüla ta mepishiba kuliji ana agüja lir. Kuli kaji, yi mayoktsü ozüng lateta aliyonga Dimapur nung yi ayokdak tesem meyirijang ka shi lir aser ano yi yimjak nung mayokba agi, talisa, kaketshirtem rongnung mozümora achir tali adoker. Iba jagi Nagaland nung yi mayoktsüba ozüng ya tamakitsü ka kümogo, anungji iba ozüng ya agiener yi ya tazüokba ka nung timi yokdaksüsüla ta Dimapur lokti tentetemi ashiba angur. Atangji, ibaji Dimapur lima aser ibaji Nagaland government tia tensa lir. Yi mayoktsü ozüngbo zünga ayu, saka aji mapa kuma benshitsüsa government nung alirtem dak tangatetba, temulungtetba aser terenemba melira, khen akoksatsü agi anaben akoksar, anungji ozüng lateta yur mamshitet menüdong akümba dang nungibo ozüng maliang tajungba asütsü. Aji oda, pei lima nung yi mayoktsü ozüngbo zünga ayu, saka yimsüsürtemi anir ajemer ta süra yangji kechi tagitsü ali ? Aji oda, Dimapur nung aliba lokti tentetem rongnung, tanga teloktemji yutsür, watsü aser kaketshirtem teloktemi dena yi ayoktsüla ta mepishiba nungji tebilemdangtsü tuluka lir. Ashiko, parnoki aginübaji yi yokdaksüner aser yi jemdaktsüner masü saka Nagaland nung yi meyanglutsü aser mayoktsü ozüng lateta aliba ya shitakba mapa kuma inyakdaksüner asütsüa akok. Atangji, alima nung nisung karbo ya techi, ya tejem ta asübatem dang chia jemnüba purtem lir. Iba jaklaji Eden tsüki nung tenzük ta asenoki azünger. Aji oda, alima nung ozüng raksartemang teimba asütsüa akok. Anungji, mapa ajak nung teimba tsütsü atsünga oa telemtetba agira alima nung ozüng maka akümtsü. Ibayongji, aiben koba teimba ta masü koba shitak ta asüba nung telemtetba agitsübaji kanga tongtibang akümer. Nagaland nung yi mayoktsü ozüng azüngba ya arogoi kangshia latetdaksüba ozüng asünungji, tanü iba ozüng mapa kuma mamshitetba tamakokjia arogo dang atonger. Ajisüaka, kodaser arogoi yi yokang ta ashitsü ? Aser kodaser yimteni latetba ozüng ka mapa kuma inyaksübaji arogo khuret asütsü ? Ajisüaka, Nagaland nung amangba purtem yi lar mekümdaktsüi kümzüka anitsübajibo arogo khuret lir. Aji oda, Nagaland nung yi mayoktsü ozüng zünga liaka, miima yi ayoker aser ajemertemjibo arogo nungertemang asütsü . Kasaji, Dimapur nungbo yi ayoktsüla ta mepishirtemjia arogo nungertem dang asütsü. Iba tensa tiaji kodang bilemdangdir, governor aser chief minister-i kechi ashir ta masü, jet ta arogo tentet NBCC, Joint Christian Forum mesüra Pastors' Fellowship aser Union-temia kechi ashir ta asübajiang temetnuba kümadoker.

OLEMSABANG

IMPUR YA TSÜNGREMI SHIMTETBA YIMTI

~ L. Kika Pongener.

Oh...Impur yimti, na Yirusalem yimti ama koda tamaren Alima kin ajaki na nungjang petinu amai penzüa repranger Kechiyong Na Yisu yimsü osangtajung sayudak mongchen Nai Naga nunger kin ter-teroksanger ajunga tenük lapoktsü.

Oh...Impur, Na Naga nunger kin ajak arangtetdak longzük Ne dak nungi Naga nunger kin ajak milen tesangwa bener ao Nai Naga nunger kin ajak dang Yisu yimsü osangtajung sayu Tanübo nai alima kin ajak dangi osangtajung bener oa sayur.

Oh...Impur, Ne dak Naga nunger ajungai langka tajung imlar Naga lima teraksa yanglushitsü asoshi Na nungi langka imlar Naga lima shirang aneptsü ne dak nungi taneptsü mozü imlar Naga nunger ajaki Impur nungi kechi ola adoker ?...ta angur.

Oh...Impur yimti, Na Aor lim arogotem longjemdak sabang Arogopurtemi Impur nungerji kodak Tsüngrular ama züngshir Impur nunger arutsü ta asüandang Tsüngrem arutsü ama yongyar Nai sayutsüngiba 'O' arogopur ajaki tenarong meronger angur.

Oh...Impur, mezüng tenzükertem-bo kangasa timtema tenzük Ao arogotemi saru tera-ra agütsüba agi kanga timtema tenzük Küm songtema itasen maka, yongjia iba tashi yangertetsüogo Tanü lanuri iba senmangji arr mekümdaktsüi wazüka yuangma.

Oh...Impur, ne otsü alima kin ajaki tenarong meronger angur Impur nung kechi ataloker ibaji alima kin ajungai tenük yoker Impur ya alima kin ajaki akümketa reprangba yimti sudakjang Impur ya alima kin ajak asoshi tesangwa milendong sudakjang.

Oh...Impur, ne dak alima kin ajak tatishitsü tajung agidakjang Impurji alima kin ajunga dang ochi indang külisur ka suangma Impur nunger dang alima kintemi ochi indang angazükdakjang Impur yimti tenem kolak nung 'Ochi Nisan'-ji ajungketangma.

Oh...Impur yimti lennir tajung adenshidak yimti kümdakjang Impur yimti ronsen penbur atenshidak yimti ka tekümdaktsü Impur yimti ya nubur ajak temulong alemdak yimti kümdakjang Impur yimti ya Tsüngrem sentsüwangshidak yimti ka sudakjang.

Oh...Impur, na sungjang tajung atangba sungdong ka sudakjang Alima kin ajungai ne dak nungi sungjang tajung onga chidakjang Impur yimti nungi alima teraksa yanglur lennir jenti adokdakjang Impur ya kin ajunga asoshi arangshidak longzük ka sudakjangma.

Oh...Takoksang Tsüngremi ozü 'Mission Center' Impur moajang Yirusalem yimti ama alima kin ajaki tushitsüsa wazüka yujangma Tanela nung tzüra-a alirtem tzüra-atemdak tzüpo ka sudakjangma Alima yimsüsur, walunir, sayutsüngir, lennir jenti adokdakjangma.
A-M-E-N.

Naga Nuchiso bushiba tongpang nung temulung shirangtsü tatalokba.

~ S. T. Yapang Lkr, Kohima

Asen Nagalima jenjang alangzükknü meji, Naga nunger talisa Aor jenti taküm tenlaogo aser tongpang aika raraogo, iba rongnung India Army den raratsü asoshi 1968 küm China limai noknü abeni aiba nokinketer aika meyipa meshilang.

Iba China limai airtem meyipa adokba otsü ya angashia aru, saka tatalokba mapang noksaküm (video) tangoka yur sayur ama, **Onet Tenemtsüng nung alir Tensen Walling, Tezülur A. Imtisoa** iba kaket ya ajanga asen jakdang alirtemi iba Nagalima asoshi onsara meranga oda pei tashi dak alia raraogo, tanü aseni ang iba Nagalima ajungtsü asoshi kecha meinyaketter! ta nemjema iba kaket züngogo.

Tensen Walling ya Naga linük asoshi anaben tashi taküm tenlaba nübu ta iba kaket nungi angateter aser ano tang tambur kümer liaka Nagalima jenjang ka alangtettsü asoshi nübu nungdaker ta süra pa tama sür apusotsüsa aliba nübu ka ta pa taküm otsü nungi angateter. Iba kaket nung Chindwin ayong awatanga aotsü merandang kasa Khar yim nungi Ingangdangba aser Tsükjemmenba Chindwin ayong nung angümoka aiba, Naga Army-tem Thekdi ayongküm nung Burma sepai ambush nung aiba kanga temulung shiranga züngogo.

Tang aser tarutsü nung Naga lanur shirsa iba Chindwin ayong aser Thekdi ayongküm ajanga süidir asen Naga nunger Nokinketerkem shirsa yangji taküm tenla lir, parnok nem salem magütsüibo ajanga maotsüla, aser iba tatalokba ya asen Aor timba sür aoba asünungji Naga linük nung shilem agiba khonang nüngsang ka ta kibur kuma ayutsü tim ta angateter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM den Aor Laishir aser tesayurtem telongjem sentong agi



Kohima, Luroi/August 30 (TYO): Kohima area nung aliba Theological college tem nung Aor Laishirtem aser tesayurtem den ABAM-i ayonga telongjem sentong "Tesendaktep Akhangshiba" omen nung Kohima Bible College (KBC), Kohima nung August 29, 2023 nü kanga temoatsü ngua agiogo, ta ABAM Executive Secretary, Rev. Dr. Mar Pongener-i sangdong ka nung metetdaksü..

Dr. Moanungsang, Secretary, Literature & Education, ABAM ajanga asenok kechi tesem aser tia nung lidir liaka tesendaktep akhanga alitsü nükla yur iba sentong ya ayonga agir, ta okila jembidang metetdaksü.

Rev. Dr. Prof. Mar Pongener, Executive Secretary, ABAM ajanga Tsüngi O ashiba mapang, pai "Asen Aortemi Tenyaba mapa inyaksü mulungteta lemteter talisa

kiyonger kin 7 dangi osangtajung bener ao, aser ano Arunachal nung kin asem den tenyaba mapa inyak. Yamaji lenmang aisü nung ABAM-i Tsüngrem mapa inyakbatem lir," ta ashi.

"Tanü lanu putu nunga parnok den iba mapa tajung inyaka aotsü mapang ka arur, anungji lanurtemi tsürabur mapang inyakba mapa mamai inyaksü bilema liang," pai ayongzük.

Paisa laishirtem dang ABAM ji kechi meteta alitsü aser tetsü oshi meima jembitsü tamatok, ta ayongzük.

"Na kechi Arogo nungi aru aji tamatok aser sannüker aser Arogoi nü kuli sütettsüsa nai liang," ta pai ashi.

Tongtipangsa pai ashiba kaji, Laishir kati shisaliok nung dang ajungtsü merangba kisüng masü, saka tanela jenganga kasa lirumedema aintsü ajungshia liasü. Paisa, asenok ya teti arok

külemi lir ta nenoki bilema mapang ajak nung ABAM bilemtetang, ta shisem.

Kasa sentong nung Theological College balala nungi Mr. Bendang Kichu, Associate Professor, Academic Dean, Kohima Bible College aser Ms. Asola, Academic Dean, Faith Theological College nungeria jembia liasü.

Parnoki jembiba mapang nung yamala telongjem akaba ya Aor Laishirtem asoshi mezüngbuba akar asünung maneni yamala telongjem tarutsü mapang nung kaa ora, Aor Laishirtem ajak telongjem tajung lia Kibubar wadang tawajemba nung inyaksü, ta ashi.

Ajak agi College 4 nungi tang tezüngdakpur aser tesayurtem 10 arua iba sentong nung aden.

Tsüngremi Aor Laishirtem aser ABAM külemi teka amtepa inyakang takok tulu agüjangma.

ANOGO ABEN TSÜNGREM DEN

Pai sang raksatsü

T.Ken 124:1-8

"Tsüngrem asenok asoshi lira, shibai asenok anema arutsü" ta Pauli Rom 8:31 nung asüngdang, aser asenoki telangzübaji metet. Tsüngrem asenok asoshi lira shingai asenok anema arutsü makok. Ibaji T.ken 124 omenji lir. "Kibuba shiba asen tsütsü liasü Pa ka masü asübo. Kodang nisungtemi asen anema apuso: Kodang parnok asenok anema ain adok: idangto parnok asenok taküm meyoker lila" (t.2,3).

Kechiaser Tsüngrem asen tsütsü ali nung, nisungi asenok chimatsü makok. Ken züluri pa tsükchirtem molusongzü aser shirem den medemdanga jembia, shibai pa dang punglok aser chima. Asenok chinüba nüburtema lir. Kodang nisungtemi na tembangdaksütsü merangdir, Tsüngremi parnok anendaksütsü ta bilemtetang.

Saka nisungi na mechitsü. Tiai na mapanger. "Idangto tzütemi asenok mobanger lila, asen taküm madak ayong yima orr lila. Idangto tzü tesashi asen madak orr lila" (t.4,5). Tzüttem asen tanela madak yima aodang asen taküm arakseter ama bilemer. Saka Tsüngrem asenok tsütsü ali nung tiai asenok memobangtsü.

Ken züluri tia agi chimaba aser araksetba noksaji melenshia sang nungi jenbu ta zülü. "Ozü kümertem sang nungi ozü ka ama, aser asenok jentetta lir" (t.7). Tsüngremi asenok araksetba aser chimaba nungi dang kümzük. Pai asenok techiokdang chioker masü saka satan sang raksatsür. Asenoki Kibubai aniba nung anidak tashi Satani asenok tanaben aputsü makok.

Takümi na techimadaksü. Takümi na teraksadaksü. Satani na tanaben tepudaksü. Tsüngrem ne den lira shibai na anema arutsü?

Nai teblemtsü ajurudang Tsüngrem ne den lir ta tamadok. Tsüngrem ochi tenangzüba ne den lir. Tsüngrem dak amangang. Pai na kümzüksü.

London nung Franklin Graham sentong nung nisung 1,000-i Khrista agizük

August 30, 2023: London nung aliba ExCel London convention center nung Franklin Graham indang sentong nung nisung 1,000 dak temai Khrista agizükogo.

August 26, 2023 nü London nung Billy Graham Evangelistic Association (BGEA)-i ayongzükba "God Loves You" tour sentong nungji nisung 10,000 dak tema aden; iba sentong nung sayutsüngir Franklin Graham-i Tsüngrem O jembia liasü.

Nüngtugu sayutsüngir, asür Billy Graham'er jabaso, Franklin Graham ya BGEA nung Tir lir. Iba tour atema BGEA-i London area nung aliba Arogo 1,000 shi den ayongteper sentong ayongzük. Sentong tenzüka osangtajung kentenerem-CeCe Winans, Michael W. Smith aser Newsboys nungeri ken tena liasü, iba sülen Graham-i Tsüngrem o jembia aser nisung 1,000 dak temai Khrista nem taküm bendanga agütsü.

Lokti den jembidang Franklin Graham-i, "Taonung ni nenok den o kar lemsatepner, kechiyong yangi alirtem rongnung karbo temelungjang teraksa lir ta ni amanger. Nisung aikati pei taküm nung nükjidong bushitsü meranger," ta ashi.

"Tsüngremi na meimer, ta ashitsü atema ni yagi aru. Pai na meimer aser na temenen nungi kümzüksü atema Pai Pa jabaso Yisu Khrista kodak nungi alimai yok," ta pai ashi.

"Nisung ajak menenpurtem aser aibelenalirtem, ajisüaka nai nü menen nungi meyipra aser Kibuba Yisu Khrista tenüng nung nai amangra Tsüngremi nü dang tai atoktsü, na merüksütsü aser na aneptsütsü. Ajisüaka nai Khrista ajanga dang Pa dangi aotsüla," ta pai ashi.

London nung alir aser iba sentong nung volunteer, Steve Johnson-i, "Tanü putu nung tiyazü tenangzükbatem aliba lima nung nisungtemi taküm nung tetezü bushir," ta ashi.

Johnson ya Tsüngrem dak mamanger ka liasü saka küm 30 tejaklen pai Khrista agizükba sülen tangbo pai yimti yimdongtem nung Khrista kulisir.

"Nisung 5,000 shibo iba sentong nung adentsü atema bus ajanga aru. Coronavirus wara aser Ukraine nung rara ajanga nüburttem mejungi kongshiogo. Nisungtemi taküm nung telangzüba bushir," ta pai metetdaksü.

Tan ita tetenzüklen BGEA-i sangdong ka ajanga, UK nung God Loves You tour atema tesem ana tali bendenloker- ka August 26 nü ExCeL London convention center nung agitsü aser ka sangküm June 22 nü Glasgow nung aliba OVO Hydro arena nung agitsü, ta metetdakja liasü.

"Taküm London-i tanaben arutsü atema onoki yongyar aser Glasgow nunga osangtajung lemsateptsü atema onoki maongka nguogo," ta Graham-i metetdakja liasü.

Impur nung Ao Baptist Arogo Diphupar rest house meshitet



August 30, 2023 nü Impur nung Ao Baptist Arogo Diphupar rest house den ABAM staff quarter meshitetba sülen tangokba noksa nung angur.

Impur, August 30 (TYO): ABAM ajanga Lim Arogotem asoshi Duplex ki yanglutsü ajungshia arua dang Arogotem aikati Impur nung Arogo rest house den külemi Mungdang staff asoshi ki ka yangluja arudar; iba atemaji Tsüngrem tenüng asanger aser Arogotem

dang kanga pelar, ta ABAM Executive Secretary, Rev. Dr. Mar Pongener-i sangdong ka nung metetdaksü.

August 30, 2023 nü Ao Baptist Arogo Diphupar rest house den ABAM staff quarter ka ABAM Executive Secretary, Rev. Dr. Mar

Pongener-i meshiteta sarasademtsüogo. Iba ya Impur nung Duplex ki ti (8) buba meshitetba lir.

Tsüngremi Ao Baptist Arogo Diphupar maneni Pa wadang asoshi nungdakba ajak moajang, ta ABAM sarasadem ayur.

AO OSHI ANGAZÜKDAK:
TANÜ ANGAZÜKTSÜBA OJANG



Rürü

(v) temang nung kongshiba agi menüna aitba (feeling sensitivity and giggle)

* Temang **rürüa** aitba agi süngjema meliteter.

Rüset

(v) mesen agi chima (completely eaten by mites)

* Yihuda Iskariot mesen agi **rüseta** asü.

OLONG PAITEP # 6621

	1			2		3	4
5						6	
7		8					
					9		
	10						
11							12
				13			
				14			
15							

TIPIEN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latetsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6620 TELANGZÜBA

TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

NAI-A YA METETTER MA



Taküm Onam benjung amongdang Kerala kübok Kochi yimti nung alima otsü tasen ka yangluogo. Iba otsü tasen ya Kochi nung Lulu Mall nung yanglu aser Onam benjungmong nung mall tiyongtsü nung pookalam ta ajaba naro tulutiba enokba ajanga iba otsü tasen yangluteta liasü. Artificial flowers agi yangluba pookalam ya World Records Union nung züngsemogo. Iba naro tasazük ya 30 feet liasü aser seret 450 taret liasü. Nisung 35-i anogo 8 tashi agia iba naro enok.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Assam CM Sarma-i Maligaon nung 'Nilachal Flyover' lapoktsü



Assam CM Sarma-i Maligaon nung 'Nilachal Flyover' lapoktsüba noksa angur.

Guwahati, August 30, 2023

(Agencies): Assam Chief Minister Himanta Biswa Sarma-i August 30 nü Maligaon nung flyover lapoktsüogo.

'Nilachal Flyover' ajanga Guwahati nung senzusenbongertem kanga anisüngzüksü kechiyong

parnoki Bharalumukh-Jalukbari lenmang nung kanga timtem ajurua aruogo.

Taoba mapang Assam chief minister Sarma-i iba flyover yangluba semdangdang "Maligaon flyover" ta ajatsü shia liasü.

Iba sülen 'Maligaon Flyover'

ta zülur entry board ka ayu saka yasüng 'Nilachal flyover' ta nüngja melen.

Yashi CM Sarma-i 'X' platform nung azük nung agiba flyover indang video ka lemsatop. "Asüng Assam nung flyover talangtiba lapoktsü" ta pai ashi.

Mizoram assembly elections jakdang ZPM aser HPC sendakteper

Aizawl, August 30, 2023

(Agencies): Mizoram nung state assembly election agitsü jakdang opposition party tongtiba Zoram People's Movement (ZPM)-i Hmar People's Convention (HPC) den sentaktepogo.

Mongulbarnü Sakawrdai yimtsüng nung telok ana tsüngda tenangzüktep ka nung sign sütep.

Iba tenangzüktep nung ZPM tenüng nungi ZPM vice president Kenneth Chawngliana aser HPC tenüng nungi HPC president Rohringa nati sign asü. Sakawrdai ya

Hmar nunger teimba ser aliba yimtsüng ka lir.

Taküm küm tatemlen Assembly election nung HPC-i ZPM bendanga yaritsü. State assembly nung ZPM candidates nem takok ngudaktsütsü atema HPC-i candidate ka danga metoktepdaktsütsü ta tenangzüktep agitepogo.

Külen, ZPM-i Hmar nunger tasürtem aser ex-HPC züngsemtem kibong nem teyari agütsütsü nangzükogogo. ZPM-isa SHC subjects agütsütsü aser sorkar kümra service rules shitak latetsü nangzük.

HPC-i 1989 nungi 1994 tashi

autonomous district council meshia inyak saka tangbo political party ka kümogogo.

Taoba Congress sorkar den peace accord ka agitepba sülen development council ka aküm, saka HPC-D-i 2018 tashi telungpur mapa inyaka aruba sülen Mizoram sorkar den accord ka agitepa Sinlung Hills Council (SHC) tentet.

Iba council nung constituency 12 lir aser Hmar nunger teimba ser aliba yimtsüng 1 dena lir. Iba nung Serlui, Tuivawl aser Chalfilh assembly constituency tashi densema lir.

Assam Youth Congress-i sorkar anema lungkak ait

Guwahati, August 30, 2023

(Agencies): State sorkari sen melena sorkar mapa agütsüba ken o atema Assam Youth Congress-i August 30 nü lungkak aitba sentong ka agiogo.

"Sorkari sempet dak rangloker mapa agütsütsü ta nangzük saka ibaji tiyazü

tenangzükba ka liasü" ta lungkak aiter kati ashi.

Opposition MLA temi "BJP go back", "Himanta Biswa Sarma go back" ta tezülubatam amer Congress Bhavan nungi lungkak aita jaja.

August 29 nü Assam Trinamool Congress Youth president Bandip Dutta-ia

Assam nung BJP sorkari aitsüogo.

"Chief Minister Himanta Biswa Sarma lenisüba kübok state nung sen yong mapa ayoker" ta Dutta-i ashi.

Assam nung BJP lennir Indrani Tahbildar asüba sülen sen yong mapa ayokba ken o temai adoka liasü.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA**

DVERTISEMENT

Kohima Dated the th August 2023

No. ED/EST/GR-IV/DEO-DMP/2019 : Applications are hereby invited from indigenous inhabitants of Nagaland for 1(one) post of Peon/MTS in Pay Matrix Level-1 at Government Hindi Institute Dimapur under the Department of School Education.

Terms & Conditions:

1. Educational Qualification: Highest class read should be indicated (along with all supporting documents i.e ST/Indigenous/Backward Certificate/Birth Certificate/Class 10 admit card/ Aadhar/ 2 Nos. of recent passport photos.
2. Age limit: The candidates should not be less than 18 years or more than 35 years of age.
3. The application should be addressed to the Principal Director, Directorate of School Education, Kohima-797001
4. Last date of receipt of applications shall be 27th September 2023
5. Submission of incomplete documents shall be summarily rejected
6. Interview shall be conducted on 10th October 2023
7. Admit Card shall be issued on 5th October 2023

Sd/-
**(THAVASEELAN K) IAS
PRINCIPAL DIRECTOR.**

Taoba Pakistan PM Imran Khan tepuokdaksa alitsü

Islamabad, Luroi/August 30 (Agencies): Linük indang miim maparen temai adoktsüba ken o dak sendakba nung special court kati taoba Pakistan ato kilonser Imran Khan tepuokdak September 13 tashi ayutsü Bodhbarnü obendang agütsü.

Iba telemtetba ya Judge Abual Hasnat Zulqarnain-i agütsü, shiba samar aliba cypher (tongtipang aser miim document) ken o jembitsü asoshi Punjab nung aliba Attock jail-i arua liasü, koba Pakistan Tegreek-e-Insaf (PTI) mendenpuba-i taoba küm political rally ka nung sayua liasü.

Interior Ministry ajanga security tsütsü tebilemsü aliba osang agütsüba sülen Federal Law Ministry nungi temelaba agir ken o ya Punjab indang Attock District Jail nung jembia liasü.

Mongulbarnü ketdangsür

temi ken o ya Attock district jail telung nung agütsü telemtetba agi, kong Khan ya Toshakhana ochimashi ken o nung aija August 5 nungi yua lir.

Khan tepuokdak yua aliba ya züngsem ana agi akumba Islamabad High Court bench kati Mongulbarnü agientsü, saka pa tepuokdak nungi aotsü memela, kechiaser cypher case jembiba obendanger temi pa tepuokdak ayutsü aser ken o jembitsü asoshi anir arutsü totuyuba agüja liasü.

Judge Zulqarnain-i pa tepuokdak September 13 tashi ayutsü atsülangtsü, tetetzü Khan ya tepuokdaksa alitsü.

PTI tekolakba indang okatsür temi ashiba agi, "manipulation of justice" mechi pa pua yua lir.

Attock Jail nungi pa nem bail agüja chioktsü imla liaka cypher temai adok ta tai tongloktsüba dak sendakba nung Khan tepuokdak yua lir,

ta pa indang legal team temi ashi.

Khan ya "judicial remand" nung lir aser pa Bodhbarnü Islamabad nung aliba special court ka nung nokdaksü, ta pa indang attorney temi anogo ka tejakdang osangbener dang shia liasü.

"Tanü court ajanga obendang magütsüdang pa pua liasü. Pa apuba anogo tejangja memeteti lir," ta okatsür Gohar Khan-i ashi.

Ano okatsür Muhammad Shoaib Shaheen-i ashiba agi, par legal team nem asaa osang magütsüi tammang nung yutsü. Ibai "manipulation of justice" lir, ta pai ashi.

Taoba küm ato kilonser menden nungi atsüngdokba sülen Khan anema ken o 200 dak tema benoka lir, ken o toku nung bail magütsür aser itemji asem anti-terrorism courts nung aser trok Islamabad district courts nung lir.

MULUNGEN O



ASO :
19th July 1933

ASÜ :
25th Aug 2023

Onoki teti meima aliba asür Ojala **Arenkokla Longkümtsür** (Ungma), August 25, 2023 anogo la shilem akümüli wadang takok nung renemer teti anisüngzük limai ogo.

Onok mangyim tia nung alidang kija, kibong, arogo aser lokti shirnokisa sarasadem den nübu, rongsen agi nungita yaritepogo, nenok ajak dang kanga pelaba iba osang ajanga lemsateper.

Nenok temeim mapa tajung asoshi onoki kecha meyipa magütsütetaka, asen takoksang Tsüngremi nenok ajak alia moajangma.

~ Temeim Chirmur, Semchir aser Kinungertem.

TENÜNGSANG AGÜTSÜR



Late Imnanochet Kichu, Chungliyimsen semchirtem nungi Kr.Sungtiben Kichu, Imtitemsu Kichu aser Imlinaro jala HSLC 2023 tatidang nung top 17th nung aser Wt. Sademrenla Kichu, Pangerlemba aser Chubamenla Imchen jala B. Ed. 2023 tatidang top 20 nung takok anguba asoshi pelaseta tenüngsang agütsür.

Tarutsü anogotem nunga Tsüngrem-i nena taküm aser kibong temoatsü aser takok nung maneni len aniang-ni ta onok sarasadem.

~ Kinunger ajak tenüng nung,
Otsüla T. Narola Pongen

Gabon army ketdangsürtemi sorkar atsüngba sangdongogo

Libreville, Luroi/August 30 (Agencies): Ketdangsür tejen aikati TV channel Gabon 24 nung, election result magi kümdaktsüba, arrtsü shibangba aser state institutions tem loksatsüba sangdongtsü atema shilem agia liasü.

Gabon indang military ketdangsürtemi ashiba agi, parnok Bodhbarnü sorkar atsüngogo. Tir Ali Bongo-i tasembenbuba election kokogo ta sangdongba sülen iba osang ya sangdonga liasü.

Military ketdangsürtemi ashiba agi parnok ya Gabon indang security aser defence forces ajak tenüng nung nokdaker.

Aonung iba osang sangdongba sülen anepdang linük yimtiba Libreville nung nüburtem aika yimtung nung pelatepa liasü, koba television nung sayuba noksatem ajanga presidential palace nung tangokba ama sayuogo.

Sorkar ya takok ngua atsüngtetra 2020 küm nungi tang tashi nung West aser Central Africa nung military-i sorkar tibuba atsüngba asütsü. Mali, Guinea, Burkina Faso aser Chad nunga military ketdangsürtemi sorkar atsüngogo.

Ketdangsürtem yagi parnok ya Committee of Transition aser Restoration of Institutions ta ajar aser ashiba agi, Gabon nung tang institution, yimden yimsüsüba, rongsenketzung aser loktiliba nung mepetmesü tulu adoker lir aser August 26 nü election agiba ya ochishia agiba masü aser agizüktsü makok.

Bongo atsüngtokba osang

sangdongba sülen Libreville nung prangbong akhaba ola angashiogo. Ajisüaka nüburtem benjungtep metenzük tsüngda yimti yimtungtem süngsüngjema liasü. Bongo'er kibong yagi iba linük aso tesadang ka yimsüsüa aruogo. Police ketdangsürtemi yimti nung tongtibang tesemtem ajak nüka liasü.

Ken o dak sendakba nung tang tashi nung Gabon sorkari kecha telanzüba agüja mali mesüra arishi küm 64 tain Bongo kong ali iba indang osang memetet, shiba yimjak nung tesüsa Honibarnü vote agütsüba mapang nguogo.

2019 küm stroke asüba sülen pa temang mejungi liasü saka election agütsü lia pa taoba mapang dang nungi temang tajungba kümer aliba ama reprangtetogo.

France Ato Kilonser Elisabeth Borne-i ashiba agi, France-i Gabon nung tang tatalokba ya kanga junga asadanga atadar.

Gabon nung sorkar atsüngba sülen iba tesem nung France jenjang mejangjai kümogo, kong parnok sepa 350 yoka lir. Mali aser Burkina Faso nung sorkar atsüngtokba sülen France nung sepaitem mintokogo aser Niger nunga military lenirtemi parnok dang par linük toktsür aotsü atema tetuyuba agütsüogo.

Kasa mapang nung China foreign ministry-i Gabon nung tensa yimjung nung bentetsü ayongzükogo aser ashiba agi, Bongo kümzüka toktsütsü asoshi jenjang tapet agütsü nungdaker, shibai April ita China semdanga liasü.

Niger aser Sahel linüktem nung Islamist telungpurtemi kanga timtem agüja arudar aser iba ajanga democratic sorkar dak tamang makateti kümogo. Gabon koba Atlantic tzüküm nung lir, iba linük yagi tetsükdaksü kar ajangshiogo, aser tang military-i sorkar atsüngba ya democracy inyakyim atsüngzüka aoba temaitsü ka lir.

Bongo'er kibongi linük küm 56 yimsü asüba agi temulung masüba Gabon nung taliba küma oya liasü. 2016 küm Bongo-i election akokba sülen linük nung mepetmesü tulu adok aser 2019 küm tir stroke asüba sülen military-i sorkar atsüngtsü tasa asa saka takok monguteti liasü.

Bongo anemertem ashiba agi, par kibongi Gabon indang totzü aser tanga rongsen ya linük nung aliba nüburtem nem agütsütsü atema tera dang inyaker aser nütsünyongsük million 2.3 rongnungi shilem asembo sensaktia nung lidar.

Gabon nung anogoshi totzü barrel 200,000 shi adokdaksür. International company tem rongnung France indang Total Energies aser Anglo-French producer Perenco nung densema lir.

French miner Eramet, shirnoki gabon nung manganese operations tulutiba lapoka inyaksangshidar, parnok ashiba agi parnok inyaksangshi sota ataogo.

Presidential, parliamentary aser legislative election agiba sülen linük mesüngjemeti tetsübu nung liasü. Iba election nung Bongo nisung 18 den toktepa liasü.

Tzünglu sashia aruba ajanga Tajikistan nung nisung 21 süogo

Dushanbe, Luroi/August 30 (Agencies): Tajikistan nung anogo asem tzünglu kanga sashia aruba ajanga tzümetsüng, anentsüh aser molushi yimzüka alua nisung 21 süogo, koba Central Asia nung tenem agi sünga aliba linük nung alimar lendong tesashi agi kongshiba tasenba alitsü.

Committee for Emergency Situations indang odongtar kati Bodhbarnü osangbener dang ashiba agi, Hombarnü tashinung nisung asüba 13 liasü aser tanü tashinung nisung 21 jungogo.

Asü-amaba ya Tajikistan yimtiba Dushanbe nungi kanga talangka mepilai jila asem nung ataloka liasü.

Social media sapang tem nung noksa aser video tem temai adoker aser yagji tzümetsüng agi mubanger aliba aser raksar aliba lenmang tem

nung gari nungtena liasü. Tzünglu kanga sashia aruba ajanga anentsüh alitsüsa lir, ta sorkari Hombarnü ashi aser nüburtem dang aser talisa Tajikistan indang tenem anasa alirtem dang saksalema alitsü metetdaksüogo.

European Union indang ambassador to Tajikistan, Raimundas Karobli-ia asür kinungtertem den asükhu lemsatepa liasü.

Iran aser danga linük sorkari temia Tajikistan sorkar den yariteptsü molunga aliba osang lemsatepogo.

Iba linük ya alimar lendong balala mela-mela ajuru. February ita linük south tsütsü Afghanistan, China aser Kyrgyzstan den arütsüa aliba Upper Badakhshan autonomous region nung rer anenzüka aluba, anentsü aser long tsükba lendong ajurua liasü.

Khelo India Asmita Women's League Dimapur Leg tenzükogo



Dimapur, Luroi/August 30 (TYO): Khelo India Asmita Women's League Dimapur Leg tanü JV Foundation Basket Court, Signal, Dimapur nung tenzükogo. Asayamung lapokba sentong nung taoba mapang state nungi asayar Vitoto Chishi alaktea jaoker liasü.

Asmita Women's League ya India nung tetsürtem saisapong ajungkettsüsü nükjidong nung ayongzükba Khelo India kübok sentong ka lir.

Sports Authority of India (SAI) aser Basketball Federation of India den longjemer ayongzükba iba league ya league balala

ayongzükba tetsürtem saisapong nung taliba shilem agidaktsüsü, sempet aketba asayar tasentem jangjatsü atema league amshitsü, tang aliba Khelo India asayartem asadangshitsü aser linük ajunga nung jenjang balala nung tetsür asayartem tetokteba balala nung shilem agidaktsüsü nükjidong nung ayongzükba lir.

Asayamung nung mezüngbuba asaya nung All Blacks (Kohima)-i Elite A (Dimapur) 16-2 agi koka liasü. Iba asaya nung Reena-i All Blacks atema points 7 idakja liasü. Tanabuba asaya nung Elite B (Dimapur)-i 9-1 agi

Splendid (Jalukie) ayong ayonga koka liasü. Maneni round-1tasembuba asaya nung Orca nungi Sosen-i points 4 idakja Orca (Kohima)-i point 8-7 agi TMB (Kohima) akokba nung teyari agüja liasü.

3x3 basketball tournament Dimapur leg ya Basketball Federation of India aser parnok kübok aliba associate züngsemtemi yimti 50 nung ayongzükba asayaba asayamung nung shilem ka lir.

Dimapur city league ya Dimapur District Basketball Association aser Nagaland Basketball Association na longjemer ayongzükba asayadar.

Erling Haaland-i Men's PFA Player Of The Year Award agizükogo



Luroi/August 30, 2023 (Agencies): Manchester City nungi mezüngbuba season kanga junga asayaba sülen striker Erling Haaland-i Mongolbarnü PFA Players' Player of the Year award agizükogo.

Tetsürtem rongnung England aser Aston Villa nungi nungtugu asayar Rachel Daly-i iba naroküm agizükba liasü. Iba naroküm atema külem asayartemi vote agüja liasü.

Iba tetushi ya Professional Footballers' Association-i ayongzükba agütsü aser iba ajanga 2023 küm English football nung tetsür aser tebur asayar tajungtiba tushir.

Haaland City nungi mezüngbuba season nung kanga junga asaya-a, pai

tetokteba ajak senteper goal 52 idaktsü aser Pep Guardiola-i aniba team yagi Premier League, FA Cup aser Champions League kokogo.

Norway nunger lanur asayar yagi season tasenba-a kanga junga asaya tenzükogo aser pai tang tashi nung asaya asem nung goal asem idaktsür lir. Kevin De Bruyne yirur aliba mapang ka nung club asoshi Haaland ya kanga tongtibang asayar ka kümogo.

Iba naroküm atema arishi küm 23 tain asayar yagi külem teammate John Stones aser Kevin De Bruyne aser Arsenal nungi asayar Bukayo Saka aser Martin Odegaard na aser taoba Tottenham striker Harry Kane nunger ajaateta liasü.

"Iba naroküm anguba ya

tetushi tulu. Külem asayartemi junger ta rprangtetba ya jangrademtsüka aser kü nem vote agütsür ajak dang kanga pelar," ta Haaland-i ashi.

"Team aser kü atema iba season ya amatoktsü makokba season ka liasü. Asayamung asemprongla akoktsü ta ni imla maliasü, anungji asayar tajungtem den iba ya ajangtetbaji jangrademtsüka lir.

"Taoba küm onok jangradema asayaogo aser taküma kasaji asayaner. Onok season tenzükogo aser maneni tejakdangi aotsü nungdaker," ta pai ashi.

Kasa mapang nung Saka nem men's Young Player of the Year naroküm aser Chelsea nungi asayar Lauren James nem women's Young Player of the Year naroküm agütsüogo.

England tetsür team Women's World Cup final tonga asayaba nung Daly aser James nati kanga tongtibang shilem agi, ajisüaka tia maka parnoki Spain mekoki liasü.

Villa nungi Daly-i taoba season Women's Super League nung goal 22 idaktsü.

Arishi küm 31 tain asayar yagi iba naroküm atema Sam Kerr, Frida Maanum, Guro Reiten, Khadija 'Bunny' Shaw aser Ona Batlle nunger ajateta liasü.

BWF-i Russia & Belarus nunger asayartem neutrals ama asayatsü temelaba agütsüogo

Luroi/August 30, 2023 (Agencies): Taruba küm February ita nungi tenzükba Badminton World Federation (BWF)-i ayongzükba asayamungtem nung Russia aser Belarus nunger asayartem neutral athletes ama tokteptsü temelaba agütsüsü, ta iba asaya achaayangba lokti tentet yagi Mongolbarnü metetdaktsü.

BWF Council-i, 2024 küm February ita 26 nü nungi tenzükba Russia aser Belarus indang passport bena aliba asayartem neutrals ama tokteptsü atema temelaba agütsüsü asoshi regulatory framework ka agizüktsü atema vote süa liasü.

Russia-i Ukraine amak tenzükba sülen BWF-i taoba küm March ita Russia aser Belarus nunger asayartem nem tenokdangba agüja liasü. Russia-i Ukraine amakba mapang Belarus ya tamendakdak ka ama amshia arudar.

April ita BEF-i ashiba agi,

linük ana nungyagi asayar aser ketdangsürtem nem tenokdangba agütsür aliba agintsü asoshi temulung süa kuli monguteti lir.

Parnoki tang International Olympic Committee's (IOC)-i linük anaprongla nungi asayartem neutrals ama asayadaktsüsü asoshi benokba sülen anidakdar.

"Iba ken o dak sendakba nung telemtetba shitak agitsü atema BWF-i IOC den kanga junga sendaktepa inyaka aruogo," ta BWF Secretary General Thomas Lund-i sangdong ka ajanga metetdaktsü.

"Asayamung balala nung neutral asayar ama tokteptsü atema temsüa aliba Russia aser Belarus nunger asayartem nem tenokdangba agütsür aliba agintsü asoshi telemtetba agiba ya yimjung ajungkettsü atema jenjang tasen ka ta onoki bilemer," ta BWF tir Poul-Erik Hoyer-i shisem.

Defender Timothy Castagne Fulham nung denogo



Luroi/August 30, 2023 (Agencies): Fulham-i Belgium nunger defender Timothy Castagne Leicester City nungi alizükogo. Pa den küm pezü atema tenangzüktepa yangluogo aser ano ita 12 atsülangtsü lenmang lapoka yuogo, ta club sangdong ka ajanga metetdaktsü.

Arishi küm 27 tain asayar shiba linük tenüng nungi 33 ben asaya lir pa ya iba Championship club nungi pound million 15 shi yong alizükogo aser pa jersey number 21 asemtsü.

Castagne ya mezüng Belgian Pro League club Genk nung asaya-a pa indang career tenzük aser iba sülen 2017 küm Serie A club Atalanta-i ao. Pa

Leicester nung 2020 küm aden aser 2021 küm FA Cup akokba nung teyari agüja liasü.

"Transfer window kanga talang liasü saka ni tatem nung idaki aruogo aser ni idaki arutetba atema kanga pelar," ta Castagne-i ashi. Pai Leicester nungi asayaba mapang asaya 112 nung goal pongu idaktsü aser assist ti süja liasü.

"Iba ya anisüngzük tulu. Ni manager (Marco Silva) den sensaksemogo aser training aser asaya tenzüktsü matateter," ta paisa shisem.

Fulham pur League Cup tanabuba round nung Mongolbarnü Tottenham Hotspur den asayatsü aser iba sülen Honibarnü league nung Manchester City-i oa asayatsü.

BILEMDANGANG

"San ama küm noklangka aliba dang nungibo keyi ama anogo ka ali tajungba."